

## Dios N' ta Kèns!

Tin ora hues ta kiboká. Tin ora e ta haña kulpabel un persona ku di bèrdat ta inosente òf ta yega na konklushon ku un persona inosente ta kulpabel. Tin ora hues ta duna sentensia muchu severo òf muchu slap. Maske e hues ta hasi máksimo esfuerso pa ta hustu, e tòg ta hende, i hende por faya. E no tin tur e informashon. E no por sa eksaktamente kiko e persona a hasi òf bisa. Tampoko e no por mira e persona su motivashon.

Beibel ta laga sa bon kla ku Dios ta Hues perfektamente hustu. Su evaluashonnan, konklushonnan, i sentensianan ta hustu. Ningun por akusá Dios di kondená e inosente, hustifiká e kulpabel òf duna sentensia muchu severo òf muchu slap.

E ta perfektamente hustu pasobra E ta omnisciente (E sa tur kos). E sa kada detaye di kada persona. E sa presis kiko bo ta hasi i papia i E asta sa bo motivashon tras di esei. *“Bo (Dios) sa ki ora mi ta sinti i ki ora mi ta lanta; Bo ta komprende mi pensamentunan djaleu. Promé ku tin un palabra riba mi lenga, ya Bo konosé esaki kaba, O SEÑOR”* (Salmo 139:2,4).

Ma na e temporada aki di aña, hopi hende ke sa ku nan por tuma Dios kabes abou...ku nan por hasi Dios kèns.

Durante e último simannan, nan a djòdjò bai gol, nan a kore paranda, nan a gosa piká un bòl. Awor, diripiente, nan ta pone un paro na e pikánan ei (supuestamente), ta konfesá i ta tuma shinishi. **Ma tur esaki tabata planiá.** Nan a plania djòdjò den piká, anto nan a plania baha man (temporalmente) pa ku piká, nan a plania konfesá i tuma shinishi. **Ademas, nan ta plania hasi tur esei otro aña atrobe!**

Warda un ratu! Dios ta siegu? Dios ta surdu? Dios ta kèns?

Imaginá ku bo ta gusta papaya hechu i ta planta algun palu di papaya den bo kurá. Bo bisña tambe ta stima papaya...stobá. Porfin un papaya ta kla pa hecha. Den bo imaginashon, ya kaba bo por sabori'è. Anto e papaya ta somentá. Poko despues, bo bisña ta bin atmití ku el a kohe e papaya i a stob'è. E ta pidíbo pa pordon'è. Algun siman despues un otro papaya ta desaparecé. Atrobe bo bisña ta bin. E ta konta kuantu el a gosa bo papaya. E ta pidíbo pa pordon'è ku el a hòrta bo papaya. Promé ku e ta bai su kas, e ta puntra kuantu tempu ta dura pa e otro papayan hecha. Algun dia despues atrobe un papaya ta desaparecé, atrobe bo bisña ta atmití ku el a kom'è, atrobe e bisña ta pidi pordon. Siman tras siman e bisña ta sigui kohe bo papayan, ta sigui konfesá, ta sigui pidi pordon.

Lo bo pordoná bo bisña? Bo ta mira bon kla kiko bo bisña ta hasi. E kos a para bira un wega! Bo ta haña ku bo bisña ta tumábo pa kèns ora e ta bin konfesá i pidi pordon! Su trasteria tin bo kansá!

**Esei no ta presis e mesun kos ku bo ta hasi ku Dios?** Bo ta ignorá tur loke Dios ta bisa, ta gosa piká pa simannan largu, anto ku kara serio ta konfesá i tuma shinishi. I mientras bo ta konfesá, kasi bo no por warda pa otro aña yega pa bo por ripití e djòdjòmentu...anto bolbe konfesá! **Trasteria!**

**Bo ta tuma Dios omnisciente i hustu pa kèns!** Bo ta kere ku Dios no sa kiko bo ta pensa i plania? Bo ta kere ku Dios no sa di bo motivashon? Bo ta kere ku Dios ta kla pa hunga bo wega? Bo ta kere ku Dios no sa di bo hipokrisia? Maske kuantu bo ta konfesá, maske kuantu bo ta afirmá ku bo no ta hasié nunca mas, maske kuantu shinishi bo ta tuma, bo ta kere ku Dios ta pordoná ora tin tantu trasteria den bo kurason?

Dios ta pordoná solamente esnan ku ta atmití umildemente na Dios ku nan ta pekadador meresiendo fièrnu pa tur eternidat, ta konfia Kristo so pa skapa nan di e destino ei, ta bandoná piká i pidiE sinseramente pa pordoná nan. Bo trasteria no ta gaña Dios!

**Dios n' ta kèns! Nos ta esnan ku ta kèns pa kere ku nos por hasi Dios kèns!**